

**Uunga siunnersuut: Inuussutissarsiutinik ilinniartitsinerit aamma inuussutissarsiuutinik
ilinniartitsinerup iluani pikkorissaanerit pillugit Inatsisartut inatsisaannik allanngineq
Ilinniartitaanermut, Kultureqarnermut, Timersornermut Ilageeqarnermullu Naalackersuisup
saqqummiussaa
pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip pingajussaaneernejarneranut

TAPILIUSSATUT ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Eqaluk Høegh, Inuit Ataqtigiit

UPA2023-mi ulloq 16. maj aappassaaneerinninnerup kingorna ataatsimiititaliap kissaataa
naapertorlugu immikkoortoq ataatsimiititaliamut suliasanngorteqqinneqarpoq.

1. Ataatsimiititaliap siunnersuummik suliarinninnera

Apeqqutit

Siunnersuutip matumani pineqartup aappassaaneernejarnerani immikkoortup
suliassanngortinneqaqqinnissaa ataatsimiititaliamit kissaatigineqarnikuvoq. Tassani
innersuussutigineqarluni ataatsimiititaliap siunnersuummik suliarinninnissaminut
Ilinniartitaanermut, Kultureqarnermut, Timersornermut Ilageeqarnermullu Naalackersuisoq
suliffimmi sungiusarfissanik amigaateqarnej pillugu ataatsimiititaliap apeqqutaanut
akissuteqarnissaanik piumaffiginninnikuunera. Akissutit taakkua siunnersuutip
aappassaaneernejarnissaanut isumaliutissiissutit tunniunneqarnissaanut killigititaq
qaangiutereerpat aatsaat tiguneqarsinnaanikuupput. Ataatsimiititaliamit apeqqutigineqartut
aammalu Ilinniartitaanermut, Kultureqarnermut, Timersornermut Ilageeqarnermullu
Naalackersuisup akissutaasa assilineri isumaliutissiissummut matumunnga kakkiunneqarput.

2. Ataatsimiititaliamit oqaaseqaatit

Siunnersuutip inersuarmi aappassaaneerneqarnissaa sioqqullugu ataatsimiititaliap siunnersuummik suliarinninnermini inuussutissarsiornermi ilinniartfinni ilinniartunik amerlanerusunik tiguisalernerup suliffinnik sungiusarfissanik amerlanerusunik pisariaqartitsilernermik kinguneqartussaanaera Naalakkersuisunit eqqaaneqarsimanngitsoq ataatsimiititaliamit eqqarsarnartoqartinneqarpoq. Ilinniartitaanermut, Kultureqarnermut, Timersornermut Ilageeqarnermullu Naalakkersuisoq ataatsimiititaliap apeqqutaanut sukumiisumik akissuteqarsimaneranik ataatsimiititaliamit qutsavigineqarpoq. Akissutigineqartoq tunngavigalugu ataatsimiititaliaq ima oqaaseqaateqassaaq:

Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissuteqaammimi innersuussutigaa siunnerfigineqartoq ilinniagaqartunik amerlanerusunik tiguisalernerup sungiusarluni suliffissat amerlassusiinut, qitiusumik ilinniartfinnit pissarsiarineqartunut ingerlaavartumik. Kiisalu sungiusarluni suliffissanik pissarsiniarnissaq siunertaralugu ilinniartit suliffeqarfinnut ornigullutik ujartuinissartik pisussaaffigigaat.

Naalakkersuisut ilinniagaqarnissaq pillugu pilersaarummik akuersineratigut, ilinniarneq lærlingitut isumaqatigiisummik imaluunniit ilinniartinneqarnissamik isumaqatigiisummik peqanngikkaluarluni aallartinneqarsinnaassasoq ataatsimiititaliamit pitsaasutut isigineqarpoq, taamaaliornikkut ilinnialerusuttup ilinniakkaminik naammassinnissinnaanera periarfissaallualissalluni.

Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissuteqaammimi sungiusarluni suliffissat 800 missaani aalaakkaasumik inissisimasut oqaatigigaa ataatsimiititaliamit maluginiarneqarpoq. Inuussutissarsiutinik ilinniartitsinerit pillugit inatsisit atuuttut, sungiusarluni suliffissat amerlassusii eqqarsaatigalugit kissaatigineqartutuut pilertortigisumik siuariarfiusumillu angusaqartitsisimannginnerat tamatumani pissutaasorineqartoq Naalakkersuisut nalilersimagaat ilanngullugu ataatsimiititaliamit maluginiarneqarpoq. Tamanna tunngavigalugu Naalakkersuisut inuussutissarsiutinik ilinniartitsinerit pillugit inatsit 2022-p naalernerani aallartittumik avataaneersunut nalilersuititsinermik aallartitsisimasut ataatsimiititaliamit pitsaasutut isigineqarpoq, tassani ilaatigut sungiusarluni suliffissanik amerlanerusunik pissarsinissamik apeqqut sammineqarluni. Pisariaqartinneqarpormi sungiusarluni suliffissat naammattut qulakkeerneqarnissaat.

Tassunga atatillugu maluginiarneqarpoq elektroniskiusumik immersugassaq oqartus-saasut suliffeqarfiillu immersussallugu pisussaaffigisaat suli atulivinneqarsimanngitsoq (tak. Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat). Tamanna tunngavigalugu ataatsimiititaliamit kissaatigineqarpoq Naalakkersuisut ajornartorsiut matumani pineqartoq

pillugu naalakkersuisoqarfiit akimorlugit suleqatigiinnissaannik qulakkeerinninnissaminnut eqqummaarissasut.

Inuussutissarsiutinik ilinniagaqarnermut inatsisip nalilersuiffiginissaanut atatillugu ataatsimiititaliap ilisimatitsiffiqartarnissani kissaatigaa.

2. Ataatsimiititaliap inassuteqaataa

Ataatsimiititaliap isumaqatigiittup siunnersuut akuerisassanngortippaa.

Taama oqaaseqarluni isumaliutissiissummilu allassimasunut paasinnilluni ataatsimiititaliap siunnersuut pingajussaaniigassanngortippaa.

Doris Jakobsen Jensen
Siulittaasoq

Nivi Olsen
Siulittaasup tullia

Eqaluk Høegh

Mala Høy Kúko

Mariia Simonsen